

Savida, lingua, partida e schlattaina – tut sto constar

Eleccziun al tribunal administrativ federal a Son Gagl

DA CLAUDIA CADRUVI / ANR

■ **Damaun elegia il parlament set novs derschaders per il tribunal administrativ. Proponì vegn era Jürg Tiefenthal, burgais da Casti. Sper cumpetenza professiunala dovri la dretga lingua, schlattaina e partida per daventar derschader administrativ federal.** Al tribunal a Son Gagl lavuran be paucs derschaders grischuns nundir rumantschs. Perquai crodi gist si sche la cumissiun da dretgira propona ina giada ina persuna cun lioms en ina regiun rumantscha. Avant che daventar giurist ha Tiefenthal (35 onns) fatg carriera sin banca ed è stà controller da finanzas. Cun 29 onns ha el cumenzà ses studi da giurisprudenza a Turitg ch'el ha terminà cun il doctorat davart mesiras per proteger il martgà da lavor. En il fratemp ha el rimnà experientschas sco actuar al tribunal federal a Son Gagl e sco manader giuridic tar il chantun. El vegn proponì sco derschader per la partiziun che s'occupa da dumondas d'asil.

Dals 77 derschaders al tribunal administrativ è mo *Christoph Bandli* dad Andeer creschè si en il Grischun. *Constance Leisinger* e *Jérôm Candrian* possedan il dretg da burgais da Tavau e da Panaduz.

Pps u ps? Um u dunna?

Per las set plazzas libras èn s'annunziadas 50 persunas, tranter quellas 16 dunnas. Entras ils derschaders che van en pensiu

sajan la pps e la ps sutpreschentadas ed hajan omaduas 3,5 sezs memia pauc, scriva la cumissiun da dretgira. La pcd haja mo in minus da 0,6 plazzas. Per l'eleccziun da damaun èn uss proponids trais candidats da la ps, dus da la pps e dus da la pcd.

La cumissiun resguarda adina era la schlattaina e la lingua. Per remplazzar ils dus derschaders franzos che van en pensiu propona la cumissiun *Raphaël Gani* (ps) e *Grégory Sauder* (pps). Tranter ils tschintg candidats da lingua tudestga sa chattan duas dunnas, uschia ch'il tribunal federal occupescha vinavant passa 40 pertschient da sias plazzas cun derschaders.

Il pli impurtant – la cumpetenza

Pli impurtanta che la partida, la lingua e la schlattaina è sa chapescha la savida ed experientscha giuridica. En l'emprima partiziun dal tribunal dovran ils derschaders savida davart il dretg da taglia e da cassas da pensiu. Per lezza partiziun propona la cumissiun *Sonja Bossart* (pcd) e *Raphaël Gani* (ps) ch'èn spezialists da taglia. La segunda partiziun sa fatschenta cun economia, scolaziun e concurrenza. Là propona la cumissiun *Keita Mutombo* (ps) e *Roswitha Petry* (pcd). Las partiziuns quatter e tschintg decidan davart dumondas d'asil e per lezzas propona la cumissiun *Grégory Sauder* (pps), *Jürg Tiefenthal* (pps) e *Christian Winiger* (ps).